



Minggu, 21 Februari 2021

Ogen: Jeremia 48: 40-47



Lanai Terbuali Dibata PusuhNa



Kai ulu maka jadi ukumen man Moap. Salah sadana siituriken ijenda eme perban ia ngelawan Dibata. Adi si bandingkan ras kata-kata nabi Amos kerna bangsa enda maka ije ituriken uga kejamna bangsa enda nandangi kalak si deban. Ituriken maka tulan-tulan imbangna si enggo mate pe itutungna ulihi. Nuriken uga kejamna ia i bas kegeluhenna.

Adi manusia ngelawan Dibata maka la lit dalanta puluh. Erdandanken si e maka sada si la banci lang idalanken manusia eme nggeluh bagi si ngena ate Dibata. Ije me maka ijumpai manusia kedamen si tuhu-tuhu i bas tengah-tengah kegeluhenna.

Tapi Dibata la banci mbuali ise IA. Maka teptep bas rawaNa pe tetap nge teridah keleng ateNa man kerina manusia termasuk kalak Moap enda. Labo ngatakenca adi pilihNa Israel maka bangsa e ngenca ateNa keleng. Lang. Tangkas kal ituriken i bas Pustaka Si Badia maka kerina tinepaNa keleng ateNa. Bangsa Israel ipilih guna banci jadi terang man bangsa-bangsa (Jes.42:6). Jadi, guna engkelengi kerina bangsa nge maka ia ipilih.

I jenda pe ndai si idah i bas ayat 47 maka Dibata erjanji maka i bas wari si reh ipehuliNa mulihi Moap alu mereken kemakmuren man bana. Kepeken Dibata tetap ngerancang si mehuli ibas kegeluhen manusia amin reh rawana tapi iumputi alu rancangan geluh simehuli. Bage me pusuh Dibata nandangi kerina kita manusia maka i bas rawaNa e pe tetap teridah keleng ate si tetap. La terbualisa pusuhNa. Sabab biak pusuh si mehuli ras keleng ate kin ije. Bali ras rawa nande nandangi anakna maka la pernah puluh i bas keleng ateNa. Mari sitandai pusuh Dibata nandangi kita anak-anakna. Dingen penanam-naman ibas geluhta.